



開原縣志

庚午李毅





節

國家當承平之日諸臣宰潤色鴻猷贊衰治理莫不濟濟然稱人文之選至若國步艱難大事已去能至死而不變者歷代不數觀也開原自見諸史冊以來出入華夷幾經兵燹資以爲守禦用以作戰場時所不免其中仗節死事爲國捐軀者赤誠永著大節彰彰載在史乘皆我鄉不朽之榮譽即或事非其人甘爲致命亦桀犬吠堯之義何苛事求此武廟享祀所以有取於王彥章也今雖國體變更無所謂君臣之分然果難毋苟免舍生以衛民者正文信國所謂天地正氣也詎可沒歟

金

梁持勝

附錄 梁持勝布 韓公 恕

字經甫河東繹州人章宗泰和六年登進士第累遷咸平路宣撫使經

歷官宣宗興定初宣撫使布希萬努有異志欲棄咸平徙海蘭路持勝力止之萬努怒杖之八十持勝走上京告行省太平是時太平已與萬努通謀口稱持勝忠而心實不然署持勝左右司員外郎既而太平受萬努命焚毀上京宗廟執元帥承充奪其軍持

勝與提控咸平治中費摩薩布萬戶韓公恕約殺太平復推承充行省事共伐萬努事泄俱被害詔贈持勝忠順大夫韓州刺史薩布鎮國上將軍金顯德軍刺史公恕明威將軍信州刺史

夾谷守中 咸平人本名附土古大定進士歷升通遠軍節度使至寧末移彰德軍未行夏兵數萬入寇鞏州公禦之兵少不能支城陷官吏盡降獨不屈夏人壯之且誘且脅志益堅遂載而西至平涼要以招降府人公佯許至城下呼曰外兵矢盡且遁矣慎勿降夏人交刃殺之詔贈資善大夫東京留守

女奚烈資祿 咸平人本姓張氏興定元年官西寧州刺史賜姓資祿久在行陣御下有法五年授金安軍節度使救鄆州城破不屈死之贈銀青榮祿大夫中京留守

石抹元毅 本名神思咸平路穆昆人初爲大理知法省錄陝右五路刑獄無冤人復委受宋弊故事有私遺物元毅一無所受明昌初爲大明等路提刑以最遷汾陽軍節度副使所至多政績後歷復州刺史會邊將失守元毅率吏卒出州經畫軍餉猝與敵遇

州倅及從吏堅請還元毅曰我輩任邊守遇敵而奔如百姓何縱使自安復何面目見朝廷共感其忠爭爲效死鏖戰久之衆寡不敵遂遇害贈信武將軍元毅性沈厚勇武過人每讀書見古人忠義事嗟歎賞慕喜動顏色子世勛後登進士奏名之日上謂宰臣曰此神思子耶歎賞久之

石抹世勛

附子嵩

字景路幼勤學爲文有體裁承安二年以父元毅死王事收充擎執

五年登進士貞祐三年累官爲太常承時朝廷徙河北軍戶河南議給以田世勛上言荒閒之田及牧馬地其始耕墾費力當倍一歲斷不能熟若奪民素藎者與之則民將失所上大悟乃罷之正大中爲禮部尙書天興元年冬哀宗北渡世勛從行明年六月走蔡州次新蔡之姜寨世勛子嵩字企隆興定二年進士時爲縣令拜哀宗於馬前哀宗嘉之授嵩應奉翰林文字以便養親城破父子俱死於難

納蘭綽赤 咸平路雅哈河明安人契丹瓜里使人招之不從以兵據改渡口賊月餘不得進旣而瓜里兵大至遂見執縛而殺之贈官兩階二子皆得叙蔭

陀滿斜烈 咸平路明安人襲父職承安中討契丹有功歷遷保大軍節度使徒知章德府事貞祐四年元兵復取彰德色埒點死之夾谷守中通志作瓜爾佳守中石抹元毅通志作蘇木曠元毅石抹世勛通志作舒穆魯世勛納藍綽赤通志作納喇綽奇陀滿斜烈通志作圖門色埒點○以上五名皆與通志異今考定更正之

明

馬林 直隸蔚州人官遼東總兵都督僉事神宗四十七年遇敵兵於尙間崖戰敗還守開原及城破死之子燃亦戰歿當時遼東副總兵于化龍參將高貞游擊于守志守備何懋官經歷張奇策俱從馬林守開原城破均死之清乾隆四十一年追贈馬林諡忠烈于化龍等俱追諡烈愍張奇策入祀節祠

潘宗顏 直隸保安衛人神宗時以戶部郎中督餉遼東擢開原兵備僉事四十六年總兵官馬林將出師宗顏上書經略楊鎬曰林庸懦不足當一面乞易他將以林爲後繼不然必敗鎬不從命宗顏監林軍出三岔口營裨子峪夜聞杜松敗林軍遂譁及旦敵



兵大至林恐甚一戰而敗策馬先奔宗顏殿後奮呼衝擊膽氣彌厲自辰至午力不支與游擊竇永澄守備江萬春贊理通判董爾礪等皆死馬事聞贈宗顏大理卿謚節愍立祠奉祀

崔儒秀 陝西陝州人天啓元年爲開原兵備僉事時開原已失儒秀募壯士携家辭墓而行經略袁應泰以兵馬甲仗不足恃爲憂儒秀曰恃人有必死之心耳遼陽被圍分守東城矢集如雨不少却會兵潰儒秀痛哭戎服北向拜自經事聞贈大理卿賜祠曰愍忠時經歷朱櫻亦殉難

劉旺

子答廝附

三萬衛都指揮成化間與其子答廝在古城堡設伏援絕矢竭突陣力戰父

子俱歿

潤常 里貫未詳任定遼中衛指揮成化中遇寇於開原平頂山與指揮劉璘耿秩高臣趙昂康繼宗俱力戰死之

袁一 京衛人官開原備禦中固備禦勇敢有爲身披重鎧追虜對敵死於陣虜恨解其



屍

資永澄 馬林稗子峪之敗永澄從潘宗顏殿後戰歿清乾隆四十一年追諡節愍

江萬春 馬林稗子峪之敗萬春從潘宗顏殿後戰歿清乾隆四十一年追諡節愍

董爾礪 馬林稗子峪之敗爾礪從潘宗顏殿後戰歿清乾隆四十一年追諡節愍

以上三名追獎由通志查出補入

黃得功 號虎山開原衛籍其先自合肥徙家焉早孤少負奇氣膽略過人時邊事起公持刀雜行伍中出斬首二級由是隸經略爲親軍累功至游擊崇禎九年進副總兵分管京衛營十一年以禁軍從總督熊文燦擊賊于武陽鏖戰光固間功最多八月又從擊賊馬光玉於浙川之吳村王家寨大破之詔加太子太師署總兵銜十四年以總兵護鳳陽泗州陵駐定遠張獻忠攻桐城公與劉良佐合兵擊之賊敗遁追斬賊將馬武王興國公箭傷面愈自奮轉戰十餘日所殺傷獨多十七年封靖南伯福王立江南進封侯旋命爲四鎮明年公移鎮廬州復命移鎮太平一意勦流賊論破左夢庚功加柱

國時清師已渡江知福王奔分兵攻太平公方收兵屯蕪湖福王潛入其營公驚泣曰陛下死守京城臣等猶可盡力奈何倉卒至此王曰非卿無可仗者公泣曰願效死公戰荻港傷臂幾墮以帛絡臂督麾下八總兵前迎戰忽飛矢中其喉偏左公知不可爲擲刀拾所拔箭刺喉死其妻聞之亦自經公忠義從天性聞以國事相規誡者輒屈已改不旋踵其軍行紀律嚴明下無敢犯所至人感其德清乾隆四十一年奉旨予諡明殉節諸臣以公材昭武勁性懋樸忠衛主殞身克明大義賜專諡曰忠桓

清

札克唐阿 錫伯人少負奇氣忠勇性成長充本邑旗營馬兵剽悍善戰屢擒渠魁以功洊升哨官清光緒初元邑東北潘家屯有潘海者以左道惑人圖謀不軌君奉命往剿受重創卒廷議照陣亡例賜卹以其子文錦承襲雲騎尉世職

王國泰

延壽平附

隸正紅旗漢軍世居開原初任三等護衛清康熙十三年八月隨經略莫洛由陝西追征吳三桂十二月至寧羌州提督王撫臣叛率兵來攻我營公同經略莫

洛拒賊中鎗陣亡二十年追贈副將廕其子同旗寇萬平康熙十四年以章京隨征陝西遇王輔臣叛衆於娘娘廟力戰陣歿贈雲騎尉世職

王國柱 隸正紅旗漢軍世居開原初任五品官清康熙十四年六月進征江西至石匣擊賊陣亡贈雲騎尉世職

羅多禮 世居尙陽堡順治七年奉命招撫甘肅爲白帽賊所殺其次子諾穆齊亦於康熙年中勦吳三桂奮勇擊賊陣歿

孝義

士君子得行其志昭勳烈於國家垂功名於竹帛足爲國史增光榮矣然窮通無定享困何常或有抱濟世之才而不得一假斧柯者則才力之精強性情之明達亦必發揮於鄉里家庭以標其奇異此正風俗人心之砥柱也開原雖彈丸下邑而宗族稱孝見得思義之人城鄉尙能偶見列而志之以爲後來者勸

清

王斌 邑人母聞氏久病無方可療斌向土神廟祈祝乃割肋取肝一片煎湯以進母食之病即愈斌亦無恙

左士魁 邑西左家窩棚人生八歲而父棄世母紀氏時年二十八以痛夫故二目失明君長務農事母至孝又四十二年母以壽終君年已五十矣哀毀骨立欲以身殉母葬後即去家廬墓旋染瘋疾乃歸一日家人偶失防範遂自經死子景源邑生員有聲閭里



張景山 邑東古城子農人係清肅親王旗壯丁家綦貧事親至孝雖菽水承歡色養備至中年喪父奉事寡母尤體貼入微光緒三十三年五月母以疾卒思戀不置葬後仍廬墓三年

張儒珍 字子馨邑南清水溝子人積學未第事親至孝年二十三時父病水脹藥不奏效醫謂宜驗糞以查病源公遂每日親嘗父糞亘百日無少間復無少難色父病旋愈越一載父復病歿公思之不置即浮厝宅後廬守三年始葬故公之孝行戚族里黨皆無閒言云

張鳳翔 與胞兄鳳起同居兄外出七年不歸查無音問鳳翔幾欲出覓以家規嚴未遂所願及析居後議往尋覓嫂及妻皆阻之鳳翔不聽持錢五串毅然自出因鳳起走時鄰人有見之於渾春者鳳翔遂徑北去途中資斧斷絕艱苦備嘗經半年餘至海山巖遇兄於俄人工場欲偕歸苦無川資乃同作俄工一年與兄偕歸後二年歿年三十四歲無子妻醮去現鳳起年已六十三歲每對人談弟相尋事猶唏噓不置

劉繼賢 字啓亭富甲一邑性樸素疏食布衣與寒士等然一遇地方公益事務輒爭先捐助無吝容長子冠英以縣案游庠次宗琦奉天法政畢業均恂謹有父風人以爲舊德之報云

雙慶 字瑞亭滿洲人賦性慈祥由盛京義州筆政出任錦州倉官在官公忠廉潔不染纖塵歸田後廣行善舉凡遇地方公益事項靡不踴躍捐輸曾獨力設敬惜字紙社一所行之終身鄉黨稱善士焉

李芳 字香圃性慈善沉默寡言充縣署戶科書吏數十年奸猾習氣一掃而空生平無他嗜好惟遇建築廟宇及刊印善書等事則奔走不遑邑人嘉其志行公送樂善好施匾額以榜其門過者榮之

張益清 字子香其先遼陽人因爲商遂移家本邑工擘窠書學者喜之性豪爽氣宇軒昂少時綦貧中年以往始漸豐富迨清光緒甲午後園場開荒君竭力購置至開熟時凡族中之兄弟子姪輩各給一方迄今談善養宗族者無不嘖嘖稱之焉

王安 字世平幼家貧無以爲學去而入藥肆因精醫術同治元年徙居舊屬法庫門

值瘟疫盛行死亡相枕藉君施捨藥餌活人甚衆同治四五年間馬賊盜起到處焚掠法庫爲巨鎮遭劫尤酷君以醫術聞於賊不忍見害反敬禮之因其求商民得免禍者數十百家後家稍裕有貧苦戚族輒加賙濟直至晚年樂善不倦壽七十三歲卒

羅玉璞 字品堂少習商天性和藹生平未嘗忤一人間有惡語相加者亦默然忍受不與辯爭民國初元于匪攻陷治城時君適充商務會總理與工務會總理徐玉魁挺身而出隨機應付一境賴以安全事後奉天總督趙公嘉其功特書保衛城闔匾額以旌之君遇人無賢不肖悉曲與周旋有請託務竭誠爲謀故君之門庭常如市焉

劉書閣 原名玉池字鏡清邑文庠生兄弟二人君出繼於久已析爨之別支人口不多頗稱小有兄鳳池食指甚繁財產所出不足以供給君乃請於母求與兄合產同居焉家計託兄經理已則勤讀以謀上進旋以案首游泮文名甚噪清光緒三十一年開原創辦巡警由陶知事委君與邑紳王毓琪充西路議紳因初倡畝捐鄉民多反對君代

佃薪餉出納不吝後家漸裕君倡議兄子劉沛出東洋求學民國初年沛回國任安徽省靈璧鳳臺等縣知事君往視之卒於沛任所

鄧雲明 其先係昌圖明水泡人生未彌月即承祧於叔父廣爲嗣明年八歲析爨移居於開原城西慶雲堡翌年父廣逝世明始九齡耳邇時開界內無近族外乏至戚惟與孀母楊氏伶仃度日明孝性天成事母備至年五十八歲明母年八十二作古明呼天搶地宛然孺子之失恃其至孝有足稱者親戚之男丁有不能娶者明嘗自備采禮爲伊娶之者六戚族喪葬爲之備棺槨衣衾者凡十數當日俄戰時避難者五百餘人均爲供給食宿在該家娶婦聘女喪葬生兒等皆有周濟由二月至年終不懈一鄉稱其義焉

劉寅卿 字文蠶邑東尙陽堡人生有至性見義勇爲游庠後以雙親年邁弗規取科名菽水承歡思娛親之晚節父年六旬膺中風疾四體不仁步履維艱乃於湯藥侍奉之外輦几盥洗便溺均躬親自料理歷久不懈鄰里因以是稱其孝焉清光緒三十一年



日俄戰起母于是年四月一日棄世翌日方將大殮日兵入境數以萬計接踵而來其勢洶洶全村老幼驚惶不知所措羣思逃避寅卿哀悼逾恒自身曷惜惟恐母之遺體爲強梁者侵犯遂蹈險不顧服孝衣挺然入其軍旅中途行約二里之遙始見有軍官者在長跪路旁掬誠哀懇雖言語不通而至誠所出日官心爲之感動當派川賴大佐隨臨哀地視察全村人民先後齊集寅卿院內希圖幸免三百人中無隙地日軍官覩此情況提筆爲之書曰吾痛悲大老嫗身死並贊爾真有奇胆等語隨即傳令凡軍人軍屬有敢侵佔斯院者懲無赦寅卿得以居喪盡禮村中房舍爲軍隊盤據無餘村人居住斯院馬廐車棚幾不能容事後皆曰吾輩得以苟全者固爲託劉母之默佑亦其子之純孝感格有以致之也今事閱二十餘年猶復稱道不置云

馮九祥 幼時清苦父母早亡叔父母亦不在堂與叔弟九如九齡二人同居仲弟業工季弟業商稍有贏餘即與二弟俱各成室自操家計晝夜匪懈嗣後弟亦勸兄成家兄以才力薄弱性鍾友愛誠恐有妻而疎兄弟不如親兄弟而無妻爲快乃以誓不娶答